

- Pastores aderant de me miserando locuti:
 'Huic servare fidem pietas hortatur; eidem
 115 Succiso laqueo, tumuli prestemus honorem'.
 Dicta probant opere, pendentem deposuere.
 Set casum, subdendo manum, tibi cura tueri,
 Angele celestis; descendo sospite vita,
 Respicio: pavor attonitos fugat opiliones.
 120 'Quolibet ire licet tibi; liber eas', meus inquit
 Tutor. Ad hec ego: 'Proposui migrare Veronam'.
 'Ecce Verona subest oculis', ait, 'ingrediaris'.
 Vix stadiis semota tribus, quam sorte viarum
 Constat ab Augusta septem distare dietis.
 125 O virtus deitatis, opus magnum pietatis!
 Introgressus, iter, causam, mandata peregi.
 Set rediens, seriemque legens in corde dolorum,
 Hic Christo duce subsisto mansurus in ipso,
 Ut resonet devota meo laus ejus in ore,
 130 Multiplici super exhibite virtutis honore,
 Pro meriti donis, pro salvi dote pudoris.
 Fluxit trimatus hodie, quo percipiendę
 Lapsa polis hausi pendens promissa coronę.
 Meta subest bravii, jam portus hora tenendi.
 135 Materies vobis migrans parebo stuporis.
 Auctori super his Christo sonet innus honoris'.
 Finierat Joseph, cenamque vocatur ad agni,
 Quarto paschalis ferie jam sole ruente.
 Cujus ad exequias fama celeberrimus abbas
 140 Advolat, ymnisona fratrum stipante caterva.
 Inter vota precum, scapulis ex parte relectis,
 Exhibita lavacro conparet candida virgo.
 O rerum nova materies! stupor occupat omnes.
 Codice verba legens commendativa sacerdos,
 145 Mutato sexu, textum mutare tenetur,
 Pro monacho monacham recitans, pro fratre sororem,
 Et qui mas fuerat, nunc femina commemoratur.
 De breve scribenda dubitantes expedit abbas,
 Nam jubet ignoti vice nominis ista reponi:
 150 'Transiit ancilla Christi' de more kalendis
 Prefixis, in fine loco subcontinuatō:

XII^o kal. maiio¹⁾ ancilla Dei in Sconaugia anno ab incarnatione domini M^oC^oLXXX^oVIII^o.

Hec in laude tui depromsi virgo serena.
 Redde vicem dans perpetue loca lucis amena.

1) sic! In der Zwetteler Hs. Nov.